



Armon Orlik (sisur) en il cumbat cun Fabian Staudenmann.



Il victur da la festa e nov retg-lutgatur: Christian Stucki.



Hubi Pazeller, il bandierel da la Federaziun grischuna da lutga.

FOTO G. N. STGIER



Curdin Orlik (sisur) ha pers la lutga cunter Joel Wicki.



Cusseglia federal Ueli Maurer ha tegnì il pled da festa.



Tribunas plainas en l'arena tar la gronda festa a Zug.

FOTOS SWISS-IMAGE

# «Savens vegn schizunt dispità»

Festa federala da lutga

DA GION NUTEGN STGIER / ANR

■ La gronda festa da lutga a Zug è dapi dus dis istorgia. L'interess per quella è stà cun bunamain 400 000 personas uschè grond sco anc mai. Bandierel da la delegaziun da lutga grischuna è stà Hubert Pazeller. El ha ditg che l'ambianza saja stada fenomenala. Durant trais dis è be ina disciplina stada en il center dal sport en Svizra e quai è la lutga. A Zug ha già lieu la davosa fin d'emna la 45avla ediziun da la Festa federala da lutga. A fin è ella ida cun la victoria da Christian Stucki, il lutgatur bernais, in um sco ina planta, in vair coloss, in gigant da 140 kilos. En sia carriera da lutga mancava a Stucki en ses palmarès anc il titel da retg lutgatur. En la lutga finala ha il Bernais da 34 onns battì en be 42 secundas Joel Wicki, el ch'avev er già il potenzial per gudagnar il titel.

## Sis «Confederads» per Armon Orlik

La victoria da Stucki, quella è stada pli che be clera. Ch'el ha en il decurs da la concorrenza già da cumbatter be cunter quatter lutgadurs ch'avevan già fatg ina giada il cranz tar ina Festa federala da lutga, quai è plitost singular. Armon Orlik per exempel, el ha già da sa dar giu en il regim cun sis da quels «Confederads»,

uschia cun dus dapli che Stucki. Wicki, lez ha già da cumbatter cunter tschintg lutgadurs che han a chasa in cranz federal. Quella realitad conferma bain che la giuria, ils sis umens, che decidan suenter mintga lutga tge lutgadurs che cumbattan in cunter l'auter en la proxima lutga ha tuttina in'immensa influenza sin il decurs da la lutga.

## Pulitas discussiuns

Hubert Pazeller da la Federaziun grischuna da lutga ed anteriur lutgatur, dals amis er numnà «Hubi», ha ditg che Orlik haja davairas retschet fermes concurrents a Zug durant ils dus dis. Quel quart punct pli pauc (total 8.75), ch'el haja survegna dals trais derschaders en la lutga cunter Stucki (total 9.0), haja chaschunà per pulitas discussiuns tranter lutgadurs, aspectaturs e represchentants da las autras quatter federaziuns, cun excepziun da la federaziun bernaisa. Suenter mintga lutga vegni savens dad aut en la stanza nua che la giuria parta en quel pèr-lutgatur che cumbatta en la proxima lutga. Pazeller, el ha ditg che savens vegnia schizunt dispità e quai pli che be ferm. Per decider tge dus lutgadurs che cumbattan in cunter l'auter cuzza la disputa magari pli che tschintg minutas. Qua saja er stà il cas la davosa fin d'emna a Zug tar la Festa federala da lutga.

## Dastgain esser cuntents

Pazzeller, el ha ditg che Orlik eria bain trumpà suenter avair manchentà la lutga finala. El saja i a Zug cun la ferma persuasiun da gudagnar la lutga e daventar retg-lutgatur. Er ils represchentants da la Federaziun grischuna da lutga eran persuas che cun quel trumf daventia per l'emprima giada in lutgatur grischun retg-lutgatur. Orlik haja propi già fermes adversaris en il regim, punctuescha Pazeller. En general ins datga lura tuttina esser cuntent cun sia prestaziun. Ord vista grischuna saja bain stà fitg positiv che la dumengia eran da set lutgadurs grischuns anc tschintg en la concorrenza. Surstà saja er el stà da la buna prestaziun da Roman Hochholdinger, ha ditg Pazeller.

## Oz è la concorrenza per in pau pli ferma

L'anteriur lutgatur e bandierel da la Federaziun grischuna da lutga ha ditg che da ses temp eria la concorrenza per in pau pli pitschna. Oz haja mintga federaziun en ses cader ina gronda paletta da lutgadurs da la classa superiura. In lutgatur che possa ir a la Festa federala da lutga, quel tutgia tar in dals fermes en sia federaziun, manegia Pazeller. Er a Zug haja quai sa verificat cun ina rotscha lutgadurs senza cranz federal mussar prestaziuns da vaglia.



Omadus coloss, ils finalists-lutgadurs.